

BiH mora ispravno i adekvatno finansirati općinske izbore

Upravni odbor ambasadora Vijeća za implementaciju mira pohvalio je Izbornu komisiju BiH za početak priprema za Općinske izbore, te pozvao sve odgovorne institucije vlasti u BiH – od onih na općinskom nivou do državnih institucija – da osiguraju potrebnu organizacijsku i finansijsku pomoć kako bi se omogućilo uspješno i neometano održavanje općinskih izbora naredne godine. Općinski izbori 2004. godine će biti prvi izbori potpuno organizirani i finansirani od strane domaćih organa vlasti.

Organizacija Općih izbora 2002. godine predstavljala je veliki uspjeh za demokratske institucije Bosne i Hercegovine. To su bili prvi izbori koje su bosanskohercegovačke vlasti same organizirale i provele; i tu su ulogu odigrale sa kompetentnošću i profesionalizmom koji zaslužuju svaku pohvalu. Općinski izbori 2004. godine se oslanjaju na uspjeh izbora iz 2002. godine, koji su dokazali da je Bosna i Hercegovina odlučna u opredjeljenju da postane potpuno samostalna i održiva demokratska zemlja.

Upravni odbor ambasadora posebno je istakao činjenicu da bosanskohercegovačke vlasti moraju osigurati adekvatna finansijska sredstva za izbore. Organiziranje i održavanje slobodnih i pravednih izbora je veoma skup poduhvat. Stoga su oni pozvali sve relevantne organe i nivoe vlasti da u svojim predloženim nacrtima budžeta za 2004. godinu, koji su trenutni u fazi pripreme, obavezno uzmu u obzir i uvrste procijenjene troškove održavanja izbora.

Općinski izbori će se održati za nešto manje od godinu dana. Da bi ovi izbori bili uspješni potrebna je aktivna i stalna podrška svih relevantnih organa vlasti, i to od ovog trenutka

pa do samog dana izbora.